

Segun Minister di Salud dr. Richard Visser

“Centro di Motivacion ta un proyecto cu lo beneficia henter nos comunidad”



ORANJESTAD — Un proyecto cu sigur ta hayando atencion di Minister di Salud Publico y Deporte, dr. Richard Visser, ta esun di Centro di Motivacion, cu ta situa banda di KIA, na San Nico-

las. Ayera e mandatario a dici di haci un bishita, pa mira con tur cos ta andando. Apesar cu tabatin un procedura basta largo pa por a haya aprobacion di e localidad, pero awo, despues di 3 luna, Minister ta contento y satisfecho cu loke e ta mirando. “Actualmente tin 15 adicto pisa den un proceso di programa y rehabilitacion, unda cu nan ta hayando les tocante diferente topico, entre nan, con pa traha obranan di man. E proyecto aki sigur ta uno di aplaudi, ya cu mirando cu e adictonan kier bin di nan mes y esey ta pone un cambio di perspectiva y sigur di caracter tambe. Na final por mira un grupo di hende cu ta hopi motiva pa haci trabou y combati nan malesa di adiccion”, e mandatario a señala.



Riba combinacion di imagennan por mira Minister su bishita na Centro di Motivacion.



Teofilma Flanegin, como lider di e proyecto “Actividad di Celebracion Himno y Bandera”, ta hopi satisfecho y positivo cu e idea di e centro aki. “E clientenan ta trahando cu varios material recicla, material di nos propio medio ambiente, creando asina producto cu lo por vende cu turista y nos hendenan local. E feedback di e clientenan ta uno di ta contento, nan ta sinti un ambiente di famia, nan ta sinti un poco paz den nan mes y nan no tabata sa cu uzando nan mannan nan por a crea asina tanto cos bunita. E meta di e proyecto aki ta pa na final, ora cu nan sali, nan mes busca un trabou y para riba nan pia,” Teofilma a duna di conoce.

Tur e productonan cu nan a crea, lo tabata visibel y disponible dia 17 di maart riba Linear Park relaciona cu celebracion di Dia di Himno y Bandera. Nan tabata exponi hunto cu Santa Rosa, cu a coopera pa comparti un stand cu nan. □

